
Telegram cunsumadëures jenà/forà 2018

Newsletter

Wenn Sie im KonsumentInnenschutz auf dem Laufenden sein wollen, abonnieren Sie kostenlos das Verbrauchertelegramm als Newsletter.

Intardiades dla ferata: Trenitalia tira en lunch l'introduziun de dërc nüs por i passajiers

ZCS: La Cherta dla cualité cun retüdes por pendolars y pendolares é bele da n pez arjignada

Tla Zentrala di Consumadus vëgnel ultimamënter registré n aumënt dles reclamaziuns porvia de ferates tardies o tomades fora y ince datrai por na stleta gestiun dl'informaziun de chësc vers. A nen paié lassura él dantadöt les pendolares y i pendolars, é pö chëstes les porsones che perd ciamó de plü tëmp sön le iade y mëss ciamó fá cunt cun problems sön le post de laur. Döt jiss da gní suporté plü saurí por les porsones che vá de por de incërch cun la ferata, sce al gniss preodü retüdes adatades. Cun le sostëgn dla Repartiziun provinciala Mobilité él bele l'ann passé da d'aisciöda gnü fat n'acordanza danter la Repartiziun provinciala, Trenitalia y la Zentrala di Consumadus por fá valch cuntra le problem dles intardiades, che foss dötaurela ma plü da sotescri. Mo cina sëgn ne n'é la Cherta dla cualité, preodüda por lege bele da de plü agn, mai ciamó gnüda realisada da Trenitalia. A chësta moda ti vëgnel neghé dërc essenziail ales pendolares y ai pendolars. Te chësta Cherta vëgnel preodü che Trenitalia ne ti paies nia les strafunghes por intardiades ala Provinzia, mo ales pendolares y ai pendolars sot forma de bonus. Le bonus messess gní acredité diretamënter sön le Südtirol-Pass, zënza bojëgn da fá domanda aposta.

La Zentrala di Consumadus präia porchël l'assessor Florian Mussner da ti fá a Trenitalia les strafunghes preodüdes tl contrat de sorvisc por l'intardiamënt tl'introduziun dla Cherta dla cualité. Le diretor dla Zentrala di Consumadus dl Südtirol (ZCS) dij: "La cualité dl trasport public local pón ince odëi canche al é problems. La Cherta dla cualité foss n meso de chësc vers, mo al n'é nia da capí cioldí che chësc stromënt important vëgn saboté a chësta moda."

MiFID II porta de plü informaziun sön i cosé por cliëntes y cliënc di sorvisc finanziairs

Sce la banca ó ajorné le chestionar MiFID ...

Ai 3 de jená él jü en forza desposiziuns de lege nöies y importantes por ci che reverda i sorvisc finanziars y les relaziuns danter mediadus finanziars y investidus. Da n valgönes edemes incá ti mëna les banches ala clientela che á investimënc te scioldi, comunicaziuns de mudaziuns dl contrat (tl lingaz tecnich ti dijon "ius variandi") y la inviëia a storje pro tla banca por actualisé le chestionar MiFID (tres chësc vëgnel fat le profil dles investidësses y di investidus).

Ara ne se trata sovënz nia de directives veramënter "nöies", mo bëgn ma de precisaziuns y renforzamënc di dovëis a ciaria di mediadus finanziars che gnô bele odüs danfora dala diretiva da denant. A chësta moda dessel gní garantí che les cliëntes y i cliënc dles banches vëgnes sconá deplü y pois chirí fora cun plü cosciënza i investimënc te scioldi che ares/ai ó fá.

N valgügn consëis dla ZCS:

- Canche an scrí fora le chestionar MiFID dessel gní respognü avisa ales domandes (zënza se lascé influenzé dala consulënta o dal consulënt): fá n profil dl risch é n aspet important por podëi defëne damí sù dërc.
- Metede averda a sciöche al vëgn fat l'ordin de cumpra de n cer produt; aladô dla sort de sorvisc (consulënza o ma esecuziun) se müda le nivel de sconanza por les cliëntes y i cliënc.
- Liesse jö avisa "les racomanaziuns personales" y la relaziun dla consulënza denanco sotescri.
- Por ester bogn da chirí fora coscientamënter l'investimënt te scioldi ól ester tëm; porchël tolesse dlaurela y ne stede a se lascé mëte prescia, an pó ince ponsé sura n valgügn dis!
- Controledede i cosc dl investimënt te scioldi, en relaziun al produt che i oresses cumpré.
- Metesse fins de investimënt realistics; sce chisc vëgn arjunc do da püch tëm vëgnel aconsié da vëne y ciaré da realisé ci che an á davagné por ne riscé nia da perde döt cant a dorada lungia.

De plü informaziuns é da ciagé sön www.verbraucherzentrale.it.

Contribut provincial por mosöres de sparagn energetich: al pó indô gní fat domanda

Dal 1. de jená incá él indô poscibl da fá domanda por ciagé n contribut provincial por les mosöres de sparagn energetich plü desvalies y por l'adoranza de fontanes d'energia renovabla. Les domandes é da ti presenté al Ofize Sparagn d'energia cina al plü tert la fin de jügn.

Do le moto "che che röia por pröm, ciafa por pröm" vëgnel ince en chësc ann indô dé contribuc da pert dl Ofize Sparagn d'energia. Porchël dess che che á intenziun da s'anuzé dl contribut provincial ciaré da dé jö la domanda le plü snel che ara vá. Ma insciö pón ester sigüsc da ciagé spo davëi ince n contribut.

Canche la ola dai scioldi dla Provinzia é öta, vëgnel desdit le contribut y al é da fá domanda danü.

Deache al é da presenté domanda de contribut denanco mëte man cun i laurs, dessel a vigni moda impormó gní scomencé impara canche an á tles mans la conferma che an ciafa i mesi finanziars da pert dla Provinzia.

Al vëgn recordé che impede s'anuzé dles detrates fiscales dl stat por les mosöres de sparagn energetich desvalies, che é porater gnüdes prorogades ince por le 2018, á les consumadësses y i consumadus la poscibilité da damané do n contribut de un n iade a nivel provincial. Le contribut da pert

dl Ofize Sparagn d'energia fej fora cina al 50% di cosc aprová y vëgn conzedü por mosöres de sparagn energetich desvalies y por l'adoranza de fontanes d'energia renovabla. Por condomini cun almanco 5 unités d'abitaziun pó le contribut cinamai rové al 70%.

Informaziuns plü avisa é da ciafé sot a www.verbraucherzentrale.it.

Do le bonus por l'energia y le gas, vëgnel sëgn ince n bonus por l'ega

ZCS: I comuns dess defata se dé da fá

Le Consëi provincial â, tl cheder de sües competënzes legislatives, bele l'ann passé d'agost deliberé le regolamënt d'esecuziun por les tarifes dal'ega da bëre tl Südtirol (decret dl Presidënt dla Provinzia n. 29 di 16.08.2017). Le regolamënt atuëia les desposiziuns preodüdes dala lege provinciala corespognënta (lege provinciala n. 8 dl 2002, articul 7) che se basëia sön i prinzijs dla diretiva dl'Uniun Europeica 2000/60/CE.

Na novité dl regolamënt é les mosöres de sconanza por consumadësses y consumadus che é te de ries situaziuns finanziaries y soziales, che an pó definí en cört "bonus sozial ega". Le regolamënt vëiga danfora che: "Tl regolamënt tarifar dl Comun pól gní tigní cunt di caji de relevanza sozuala particolara y preodü i criters por l'esenziun o la reduziun dla tarifa."

La regolamentaziun plü detaiada dla tarifa ti speta insciö ai singui Comuns, che pó a chësta moda danterater stabilí che les zitadines y i zitadins te situaziuns de bojëgn n'á en pert o daldöt nia bria da paié la tarifa.

"Tl caje de fatures por l'adoranza a ciasa nia paiades ne pól nia gní fat sté sö la fornidöra d'ega da bëre. Por vigni porsona residënta mëssel gní garantí almanco 50 litri d'ega da bëre al de sciöche minimum vital."

Chësta cuantité ti corespogn ala "quantité minima vitala" tla Talia, stabilida dal decret dl Presidënt dl Consëi di Ministri di 13 d'otober dl 2016 (tarifa sozuala dl sorvisc dl'ega).

Insciö vëgnel ince assicuré a nivel provincial mosöres de sconanza importantes por ci che reverda l'ega da bëre por families, ince aladô dla Cherta di dërc fundamentai dl'Uniun Europeica. Chësta ti garantësc a döttes les zitadines y a düc i zitadins da ti podëi pomez ai sorvisc de interes economich general, sciöche por ejëmpl l'ega da bëre.

Sëgn ti spetel ai Comuns l'inciaria da mëte en pratica avisa ci che é gnü stabilí dala legislaziun provinciala. De plü informaziuns él da ciafé sön www.verbraucherzentrale.it.

É l'ingver bun contra les desfridades?

L'ingver (zingiber officinale) é conesciü por süa saú aromatica y picanta. Te ciasadafüch vëgnel adoré le fió sot tera dla planta d'ingver, a chël che an ti dij rizom, por ejëmpl sciöche erba da saú por les jopes o pro tês. Por n têt da ingver adoron dui de de gran cazüsc de ingver frësch graté. Chësc é da scialdé sö te n liter d'ega, lascé cöje por diesc menüc alalungia y dedô coré jö.

L'ingver é rich de sostanzes vegetales secundares, danter chëstes sostanzes anties y picantes. Al ingver ti vëgnel atribuí na faziun antiossidanta, antibaterica, antivirala y che tëgn indô infeziuns, al dess ince

ester bun cuntra le gní stome, le rejeté y la mancianza d'apetit y al dess ince stimolé la formaziun de s'üc por la digestiun. Tla medejina tradizionala cineja vègnel adoré l'ingver por curé romatisc, me ai muscui y desfridades. Ince t'Europa vègnel tres deplü reconesciü sciöche meso cuntra disturbs al magun y al stentin y cuntra le stome. Al n'é nia ciamó gnü desmostré scientificamënter s'üa faziun de prevenziun cuntra les desfridades. Impó vègnel ponsé che les sostanzes picantes che é tl ingver scialdes le corp da daite y stimolëies l'insangaziun dles mucoses; insciö ne röiel nia plü tan saurí ite agënc patogens.

L'ingver crësc te regions tropicales y subtropicales. L'India é le maiú produzënt, le plü ingver vègn indere esporté dala Cina. Tl passé á l'ingver dala Cina dé tl edl por la presënza, en pert ince alta, de pestizig.

Detrates dala cuta pro imobii: prorogaziun y novités

La lege de stabilité dl 2018 á proroghé les detrates dala cuta dl 50% por laurs de ressanamënt cun spëises mascimes de 96.000 euro y chères dl 65% por ressanamënc energetics (cun limitaziun al 50% te n valgügn caji, la spëisa mascima variëia); al é indere da osservé n valgönes condiziuns nöies.

Al é ince gnü confermé le bonus por mebli che speta por laurs de ressanamënt metüs man do dal 01.01.2017 por chi che al é le dërt de detrata fiscalá dl 50%. Al pó gní trat jö le 50% de alplü 10.000 euro por mebli y aparac eletrics cun n'efiziënza energetica alta.

Na novité é le "bonus vërt" cun chël che an pó trá jö dala cuta le 36% de alplü 5.000 euro pro unité imobiliara por inverdí terrasses, soras y i.i.

Ci che é d'importanza canche ara se trata de detrates dala cuta é che an dess ponsé sura avisa dan, tratan y do l'intervënt, ci che al ó ester por ne riscé nia che i scioldi dles alisiraziuns fiscales, che an mina d'avëi sparagné, vais a perde. Por podëi s'anuzé deplëgn dla detrata fiscalá dessel gní stlarí damperfora, sce al vègn bëgn paié assá cuta sön le davagn.

Por ci che reverda les cutes dess vignun ciaré da se informé instès adora assá - chël ó dí denanco scomencé i laurs - pro consulëntes o consulënc profesionai. Che che é responsabl y á spo n problem sce al ess da gní dant fai é les porsones atocades instësses che á dé l'inciaria da fá i laurs y ó s'anuzé dl bonus fiscal.

Tarifaziun vigni 28 dis por telefon, fonin, internet y televijiun: tröpes parores, püc fac - al é da aspeté co che ara jará inant

Da aurí dl 2018 inant messará düc i sorvisc fá aladô dla lege na faturaziun vigni mëis, mo al ne vègn nia preodü che al mëssess gní retü les somes calculades surafora sön la basa di 28 dis por i mëisc passá. L'autorité de control se tol a dí che canche al vègn mudé le tëm de faturaziun (d'aurí dl 2018) mëss i gesturs (TIM, Vodafone, Fastweb y WindTre) tl medem tëm ince rete i imporc faturá implü, nia iustificá. I gesturs á fat recurs dan dal Tribunal aministratif. Dal punt d'odüda dles consumadësses y di consumadus n'é döt chësc nia regolamenté sciöche al aldiss da ester. Chiló él n valgügn consëis por s'orienté y savëi ci che al é da fá.

1. Mi contrat de linea fissa, internet o moscedé é passé a na facturaziun vigni 28 dis da d'aisciöda dl 2017

Al é anfat sce al é bele gnü fat na reclamaziun o no, sciöche la situaziun é sègn vègnel aconsié da aspeté ci che les sozietés fajará d'aurí, chël ó dí sce ares acreditèia indò, canche ares passa ala facturaziun vigni mëis, i dis "implü" che é gnüs calcolá o no. N caje d'ejèmpl cun resposta negativa ala reclamaziun á la Zentrala di Consumadus dl Südtirol (ZCS) bele mené tres l'apajada; le gestur indere s'á refusé da rete i imporc reclamá, fajon referimënt al recurs pendënt dan dal Tribunal aministratif.

2. Mi contrat de fonin y de televijiun a paiamënt é passé a na facturaziun vigni 28 dis da d'aisciöda dl 2017

Da d'aurí dl 2018 inant él da ciaré do che la facturaziun vègnes bëgn fata vigni mëis y nia plü vigni 28 dis. Al ne vègn nia odü danfora retüdes.

Sambègn controlará ince la ZCS sciöche la cossa jará inant.

Te nosta newsletter debann ves informarunse di svilups atuai. I podëis s'aboné sot a <https://www.consumer.bz.it/de/newsletter-anmeldung>.